



Majlis Ugama Islam Singapura

Khutbah Jumaat

26 Ogos 2016 / 23 Zulkaedah 1437H

Rahmah Kepada Alam, Kurniaan Allah

الْحَمْدُ لِلَّهِ الَّذِي نَزَّلَ الْفُرْقَانَ عَلَى عَبْدِهِ لِيَكُونَ لِلْعَالَمِينَ نَذِيرًا،
الَّذِي لَهُ مُلْكُ السَّمَوَاتِ وَالْأَرْضِ وَخَلَقَ كُلَّ شَيْءٍ فَقَدَرَهُ تَقْدِيرًا،
وَخَلَقَ الْإِنْسَانَ مِنْ نُطْفَةٍ أَمْشَاجٍ يَبْتَلِيهِ فَجَعَلَهُ سَمِيعًا بَصِيرًا، ثُمَّ
هَدَاهُ السَّبِيلَ إِمَّا شَاكِرًا وَإِمَّا كَفُورًا. وَأَشْهَدُ أَنْ لَا إِلَهَ إِلَّا اللَّهُ وَحْدَهُ
لَا شَرِيكَ لَهُ، وَهُوَ عَلَى كُلِّ شَيْءٍ شَهِيدٌ، وَأَشْهَدُ أَنَّ سَيِّدَنَا مُحَمَّدًا
عَبْدَهُ وَرَسُولَهُ، اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ
وَسَلِّمْ تَسْلِيمًا كَثِيرًا. أَمَّا بَعْدُ، فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا
تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dirahmati Allah,

Pada hari Jumaat yang penuh barakah ini, marilah sama-sama kita pertingkatkan ketakwaan kita kepada Allah dengan melakukan ketaatan dan meninggalkan kemaksiatan. Semoga kita memperolehi petunjuk dan hidayah-Nya dalam melayari kehidupan ini. Amin.

Saudara, khutbah minggu lalu dan sebelumnya telah menyentuh tentang sifat rahmah kepada sesama insan, maka pada hari ini, marilah bersama-sama kita menghayati kepentingan sifat rahmah terhadap persekitaran kita, sama ada pada alam sekitar mahupun makhluk ciptaan Allah yang lain seperti haiwan.

Saudaraku,

Allah s.w.t. telah mengurniakan kepada insan alam ini dengan segala sumbernya. Ia bukan sahaja sebagai satu kurniaan semata-mata, bahkan ia juga merupakan suatu amanah. Amanah yang akan dipersoalkan tentangnya esok di akhirat. Bagaimana kita menggunakan segala nikmat tersebut?

Maka saudaraku, Menjaga alam sekitar dan keseluruhan sumber yang ada padanya, sama ada yang bernyawa seperti haiwan, tumbuh-tumbuhan, ataupun yang tiada ruh dan nyawa. Ia merupakan sebahagian daripada kepentingan di dalam agama kita. Ia juga membuktikan betapa prihatin agama ini tentang segala yang mempunyai kaitan langsung dengan kehidupan manusia.

Saudaraku,

Jika sekiranya kita menelusuri ayat-ayat suci Al-Quran tentang alam sekitar dengan teliti, maka kita akan dapati ayat-ayat tersebut dipaparkan oleh Allah dengan gaya bahasa yang

sangat indah, tersusun rapi sehingga boleh memukau pandangan mata hati yang melihat dan menarik akal manusiawi yang berfikir. Ini secara tidak langsung memberi isyarat kepada kita untuk menjaga alam ini agar ia terus kekal indah dan terpelihara. Agar ia sentiasa dapat memberi kebaikan kepada umat manusia keseluruhannya.

Saudara, renungkanlah. Bukankah bumi yang selama ini tempat manusia berpijak dan langit tempat mereka menjunjung, ibarat sebuah kediaman luas untuk mereka sama-sama berlindung dan bertuduh, mencari rezeki dan berusaha serta berehat setelah pulang dari bekerja. Tidak akan mungkin orang yang berakal akan menghancurkan rumah kediamannya sendiri? Dan tidak mungkin seorang yang waras akan merosakan tempat yang menjadi sumber rezeki mereka setiap hari?

Justeru itu, jika alam sekitar ini diabaikan dan tiada usaha untuk memeliharanya sehingga timbul kerosakan, maka kerosakan yang berlaku - mengikut perspektif Al-Quran - berpunca dari hasil tangan manusia yang tidak bertanggungjawab dan tidak mempunyai sifat rahmah kepada alam. Ini disebut dalam surah Ar-Ruum ayat 41 yang berbunyi:

ظَهَرَ الْفَسَادُ فِي الْبَرِّ وَالْبَحْرِ بِمَا كَسَبَتْ أَيْدِي النَّاسِ لِيُذِيقَهُمْ
بَعْضَ الَّذِي عَمِلُوا لَعَلَّهُمْ يَرْجِعُونَ ﴿٤١﴾

Maksudnya: *“Telah timbul pelbagai kerosakan dan bala bencana di darat dan di laut dengan sebab apa yang telah dilakukan oleh tangan manusia; Allah menghendaki agar mereka merasakan sebahagian daripada (akibat) perbuatan mereka, agar mereka kembali (ke jalan yang benar.)”*

Sidang Jumaat yang dirahmati Allah,

Apa yang saya sebutkan sebentar tadi merupakan sesuatu yang terkait dengan bumi dan alam sekitar. Maka bagaimana pula dengan sikap kita terhadap makhluk lain seperti binatang? Menurut agama kita- agama rahmah- setiap yang bernyawa itu memiliki hak yang perlu kita pastikan ianya tertunai.

Perhatikan peristiwa yang berlaku di zaman Nabi Muhammad s.a.w., di mana seekor binatang mengadu kepada Rasulullah s.a.w. tentang perilaku tuannya terhadap dirinya.

Pada suatu hari, ketika Baginda s.a.w. masuk ke salah sebuah kebun milik seorang Ansar, Baginda kelihatan seekor unta yang sedang merintih. Nabi s.a.w. dengan segera mendekatinya dan mengusap-usap belakang telinganya hingga ia menjadi tenang lalu senyap. Nabi s.a.w. lalu mengajukan persoalan dengan nada suara yang agak tinggi: *“Siapakah pemilik unta ini?”*. Seorang pemuda Ansar datang mendekati Rasulullah s.a.w seraya berkata: *“Saya pemiliknya ya Rasulullah.”* Baginda lalu berkata kepadanya: *“Tidakkah kamu takut kepada Allah*

terhadap binatang ini yang Allah telah memberikannya kepada kamu? Sesungguhnya ia telah mengadu kepadaku yang engkau membiarkannya lapar dan membuat tubuhnya menjadi letih (kerana kerja yang tiada henti). [Hadith riwayat Abu Daud dan Ahmad]

Subhanallah! Peristiwa yang baru saya sebutkan tadi, menggambarkan betapa tinggi sifat rahmah dalam diri Nabi s.a.w. sehingga membolehkannya menyelami perasan dan keperitan yang dialami oleh seekor haiwan! Bahkan betapa tingginya nilai rahmah di sisi Islam. Berlaku rahmah bukan sahaja kepada kenalan dan ahli keluarga, akan tetapi kepada setiap yang bernyawa, bahkan kepada setiap nikmat kurniaan tuhan.

Dalam sebuah hadith yang lain Nabi s.a.w. menceritakan tentang seorang wanita yang secara zahirnya, kelihatan seperti seorang ahli ibadat. Namun, dia mempunyai tabiat buruk iaitu menganiayai seekor kucing peliharaannya. Maka Baginda s.a.w pernah bersabda yang bermaksud: *“Seorang wanita masuk neraka hanya kerana seekor kucing yang diikatnya. Kucing itu tidak diberinya makan, tidak pula dibiarkannya pergi mencari makanan sendiri.”* [Hadith riwayat Imam Al-Bukhari]

Bahkan dalam hadith yang lain Nabi s.a.w. menjelaskan bahawa seorang wanita pelacur daripada Bani Israil

diampunkan Allah dosa silamnya, disebabkan perbuatannya memberi minum kepada seekor anjing yang kehausan. [Hadith riwayat Imam Al-Bukhari]

Saudaraku,

Melalui kisah-kisah yang baru saya nyatakan sebentar tadi, dan juga melalui khutbah sepanjang bulan ini, ia memberi gambaran kepada kita kepentingan aspek rahmah di sisi Allah s.w.t. Ia juga menegaskan bagaimana aspek rahmah tidak seharusnya terpisah dari kehidupan seorang mukmin. Semakin kita beragama, seharusnya kita ini menjadi individu yang semakin berlaku rahmah kepada mereka yang berada di sekitar kita, kepada jiran tetangga, kepada sanak keluarga. Kita seharusnya menjadi sumber rahmah bagi masyarakat.

Bagaimana mungkin kita mengaku beragama, sedangkan di hati ini masih ada lagi perasaan dendam kesumat sesama insan, ataupun bersama rakan sekerja? Bagaimana mungkin kita mengaku mengikuti teladan Nabi rahmah, Saidina Rasul s.a.w., sedangkan masih ada lagi rasa benci membenci sesama muslim, disebabkan persoalan fiqh, yang telah lama dibahaskan para ulama? Atau pun susunan akidah mana yang lebih tepat? Apa alasan kita saudaraku, tatkala kedua kaki ini berdiri esok di padang Mahsyar, berhadapan dengan tuhan Pencipta, tuhan yang Ar-Rahman Ar-Rahim?

Maka fikirkan setika, lakukan muhasabah dan refleksi, sama ada kita benar-benar telah mempraktikkan aspek rahmah dalam kehidupan kita, ataupun sebaliknya. Semoga kita memperolehi perlindungan daripada Yang Maha Esa, dan semoga Allah menjadikan kita sebagai hamba-hamba-Nya yang sentiasa mensyukuri anugerah pemberian-Nya. Dalam masa yang sama kita mencontohi dan mengamalkan sifat rahmah terhadap segala kurniaanNya. Amin.

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.